

四庫全書

集部

欽定四庫全書

東萊詩集卷五

宋 呂本中 撰

初去白沙再望路中江南諸山慨然有懷

青山如美人濃淡各有態挽之不肯來乃似孤竹隘念
無千里風限此一衣帶夏木與藩屏不畏炎日曬三年
白沙游藉爾寬眼界脫身塵垢中一笑終不壞別君更
舉酒未了清淨債雖無絲竹娛會有詩律快何如少陵
翁亦為杜鵑拜吾詩有餘歡此語君勿怪

赴濟陰留別一公

近別君莫嗟遠別君莫惜往來天壤間誰為不相識十
年幾相別日月虛棄擲見君長江口已作胡眼碧別君
廣陵城妙語摧霹靂今別知幾時復念駒過隙坐成千
里阻當有片言益不勸君愛身不勸君強食勸君以勇
決萬事要努力愚夫之所欣智士之所戚譬如醉而顛
亦有傍震觀聲色糾纏人萬劫困封植本自驕惰生亦
以因循得實惟招侮慢豈止礙空寂居然耳目內反務

化勑敵誰能深山中弄此無孔笛芳草變蕭艾每為長
太息如公定不然此語當謾憶何妨膏腴地更論去荆
棘君看一壺用亦有千金直

五月五日泊舟北神與關聖功唐充之李元輔作
別意殊惘然端午日行次洪澤把酒北望已如異
世事矣因念屈大夫之死正是此日慨然有感於
心輒成長韻奉寄李民師翁士時來可求和也

麥上蝴蝶飛水邊鸕鶿卧却望山陽城已若一夢過今

晨又端午把酒意亦愔風回浪蹙船開淺沙著拖故人
阻情話客子且清坐更念屈大夫是日遇奇禍空餘後
世名第子只增些寶璐與明月皎皎不受浣固知汨羅
沈可到首陽餓還書二三老此語君可和

贈唐充之魚簡盆中

三年白沙看江山可當中原故人面今來千里逢故人
笑談却作江山見江山故人不相遠平生志願于君滿
唐侯獨立一代無張侯與之來集枯老松本自歲寒外

良馬不畏長途驅飢年百室仰粟廩暑路六月懸冰壺
念昔關注不相貸視世好爵如機械上書索去不作難
云我未了平生債後生少年延頸觀諸公故人思一快
基本未定天奪之賴有君侯數人在龍媒已遠風馭回
坐歎四海梁木摧爾來老謝又繼往但覺眼界常塵埃
長江無津出光怪迴野入夜開風雷此語不誣君可驗
請君更討防身劍

夜雨

夢短添惆悵更深轉寂寥如何今夜雨只是滴芭蕉

出門見明月

出門見明月入門思故人故人如此月一見一回新
明月相見多故人相見少問爾何因緣長似此月好
故人在何處南北東西路明月在咫尺夜夜庭前樹
明月莫

虧缺故人莫離別願月如故人故人亦如月

夜夜庭前樹一作宿

我庭
前樹

往歲在白沙見江上往來祀神者殺猪羊鵝鴨日

夕相屬也有感於心後至濟陰因成長韻當托
白沙故人投之廟前庶幾神少知自戒乎

今日殺一羊明日殺一豬問神何所樂而必為此歟羊
死噤無聲豬死足號呼傷哉鴨與鵝閉目頸已朱問神
此何負神亦何所取吾知斯民愚非是神所許江船一
帆風江田一犁雨民或謝神勞尚使相告語但采澗溪
毛足以薦筐筥何須汚刀几而後羞鼎俎于物固無怨
于神亦無苦更令嗚嗚歌時送坎坎鼓

濟陰野次

去年騎馬古城西
雨浣鞍韉一尺泥
今日重來轉無緒
強扶衰疾遶河隄

毛彥謨容膝軒

黃金為樓玉為梯
畫旗素錦生光輝
不如一菴醉而歸
倒卧側立無東西
君才于用無不宜
會稽竹箭梁山犀
賈而不售君不疑
亦不自以為珍奇
淵明妙處君得之
萬古一首歸來辭
一菴容膝君所知
不用芥子藏須彌

望風懷想三歸依眼前有睫見者誰世人紛紛不自治
何異羊質蒙臯比見豺而戰忘其皮牆頭燕雀莫漫肥
汝不仰看鴻鵠飛伯夷去採西山薇想渠瘦亦不勝衣

不羨汝曹腰十圍

一本倒卧側立無東西下云小窓容膝君所知不用芥子藏須彌君才于

用無不宜醫無閭之珣玕琪會稽竹箭梁山犀賈而不售君不疑亦自不以為珍奇淵明妙處君得之萬古一首歸來辭望風懷想三歸依眼前有睫見者誰我生甚窮今則衰何異羊質蒙臯比見豺而戰忘其皮恨不與子歸同時君生于書無不窺文字皆好尤長詩令我琢句相追隨牆頭燕雀莫漫肥汝不仰看鴻鵠飛伯夷去采西山薇想渠瘦亦不勝衣不羨汝曹腰十圍

濟陰寄故人

柳絮飛時與君別南樓把酒看新月似當年離別時
柳絮隨君何處飛千書百書要相就思君不見令人瘦
念君情意只如新顧我形骸已非舊朝來有信渡黃河
鴈足繫書多網羅城南城北芳草多明月如此奈愁何
晁叔用得古鏡二一以遺法一上人澄澈可愛底
水隱然蜃樓突起又作杯渡禪師像翩然衣動
正在中流間也一求記于予因為作歌

晁郎高居卧冰雪得此懸空兩秋月已將屋角倒魑魅
更與人間洗炎熱一月團團如扇面一月菱花光掣電
憐君囊中一物無意欲分君托方便菱花入袖世莫識
空堂夜留疎雨滴天生寶氣有期會復恐藏去終無益
君行萬里尋劒術山精喚君君莫出寒泉百尺傍枯樹
狡兔九月投霜鶻未須潘謂苦哦詩或自蘇公識神物
下有禪和不笑人須君一照蛟龍窟

別離行

城頭草木日夜黃九月北風天雨霜月色入戶侵我牀
美人乃在天一方舊游可樂不可忘恨君不隨鴈南翔
恨妾愧守此空房曉風忽來吹夢長夢中與君還故鄉
黃金為屋玉為堂與君更笑億千場不須合佩雙鴛鴦

李念七久不見過二絕

不隨殘暑退青蠅入眼囂塵漸可憎靜裏工夫君莫厭
夜窓重對短檠燈

羅襦襟解燭滅後唱雉鳴盧人散時願君莫忘點軒老

少小先蒙國士知

往年與闕止叔相別角上止叔見勉學道甚勤且
曰無為專事文字間也及今五年矣尚未有所
就因作詩見志且以自警也

老闕別我時笑我勤苦甚曰吾與子然同此一味靜收
缺粥魚底筆墨有譏評五年念此語但見日月競雖無
蛾眉斧亦有晏安鳩斯人今何往想作大樹蔭我走足
欲蠶始學兩鳥噤君看齊聲謳何異衆哭臨繁紅成春

條本自其天性風雨頌繫

一作摧折

之不有十日盛人生亦

作聊共未免此病乃知鑣頭通已勝狗脚朕

洞山曾下有僧法空

具宿命時有通上座者刻苦練行空以水照之知其前身為魏孝靖帝也時衆中謂通為鑣頭通云

六月初三日雨後步至城東

涼秋生郊原快雨灑庚伏曲肱訪幽睡朝夢不可續開
門招此山爽氣滿岩谷村蹊沒衰草古院蟠翠木東行
得幽亭小徑來已熟下有十里濠暑退萬荷綠恨無沽
酒錢一醉起枵腹人生要快意豈止寄幽獨君看後池

蛙聲韻故不俗怡然供清歡何必絲與竹

得揚州書

書來每恨日月晚書去還憂道里長但得老親常健好不辭新歲且窮忙文章已受塵埃浣禪觀多為疾病妨

趁得殘春北歸否近簔臨穎是吾鄉

道里一作道路

歸計未成作詩寄懷

萬里田園半有無十年歸夢阻江湖文章謬忝聲名在氣體猶須藥餌扶客路因風起舟楫水田無雨卧菰蒲

青帘白酒斜陽外不與行人滿眼酤

閱舊詩卷有懷

好詩無過亦無功
擬還家贈阿宗
會有江山與前袞
且無塵土共從容
大汪矯矯雲間鶴
老謝森森澗底松
回首百年俱一夢
暮年文采更誰從

且無一作略無

高郵道中荷花極目平生所未見

綠淨紅深水不流
炎天烈日自然秋
只供野父已無計
便與行人亦暗投
明月不來江北岸
好山應在石城頭

何年得映潘妃步更放君王作意游

高郵遇大熱作

南風極炎暑赤日不可傍扁舟在地底淺水安得強坐
懷長河水未盡渴飲狀甚憎食案蠅意欲不相讓旱苗
乾欲死蒲藕秋可望平生投筆手中有無盡藏爾來夜
深藏穩着犢鼻上有如三年艾更復加百壯黑雲翻日
脚好雨終不放雷聲無事來殷殷車百兩東街暴泥龍
西街設銅像利害有不同未易相得喪農夫責催租日

夕困大杖那知清歌前把酒有餘量

題孫廣伯宅薄家壁

古木輪囷老歲寒好花無力便凋殘
秋風只在盆池上但見江湖萬里看

贈孫廣伯

人皆笑君拙我獨喜君直拙則世所無
直則未易識昔者中丞公事主以一德
從容進退間多士所取則朝廷九鼎重
冠冕萬夫特塵埃困大路此老難再得
至今門

下士必以身許國孰知強弩末而有百鈞力賢孫後來
秀見我好顏色收功却掃中欲任門內責空券入善陣
匹馬見勅敵不嫌不識察但恨無此獲欲赤莫如丹欲
黑莫如墨吾常持此言以辨主與賊苟無牛羊害則有
天地塞君能但拙直亦莫忘黑白

與吳迪吉諸人赴晁季一陳塘范園之游因成十

韻

春風未寂寞頻枉故人車客舍輕寒下村煙宿雨餘曉

紅留隱映新綠上扶疎妙墨懸高榜殘章得舊書

即所謂白

水滿時

蛟龍忽舒卷草木自清虛渺渺登臨地悠悠水

雙鷺下

竹居只今那復有本自不關渠塘水空遺廟

塘即陳元龍所開今

有元龍廟

鼉淙亦故墟

園西有寺名鼉淙唐武宗時所建寺邊有鼉為水害

同行

喜佳士所到即吾廬政恐習池飲風流却未如

送趙季一罷官西歸

少年閱人若郵傳漢廷公卿日千變故人一蹙便青雲
咫尺相逢不相見丈夫鬚髯但如戟黃塵沒馬渠未識

晁侯文采老不閒兩耳壁塞目為昏三年刺促簿書裏
更覺和氣生春溫誰能種蘭生九畹從公不辭墮車蹇
冰霜入眼蚊蚋去桃李成蹊草茅遠胸中滄海無水旱
眼底浮雲看舒卷頃來江上幾送迎聚蚊成雷公不驚
笙竽沸地不知曉公但寒窓延短檠乃知風雨晝窈冥
我亦不廢晨鷄鳴箕山之下潁水邊脫冠便歸須壯年
諸公先尋買山錢我亦從今當着鞭

侯羸

游士縱橫翻覆手山東諸侯望關走厯下邯鄲無使來
長城易水非燕有大梁賓客舊如雲夷門監者未有聞
謾將苦語送公子市井屠兒虛見存後來毫髮爭得喪
紛紛小兒誇跌宕不知世有公子年一生放迹江海上

昭君

凍雲霾空風折木烏孫公主歌黃鵠昭君請自嫁單于
當時各倚顏如玉露髻雲鬟胡地塵帳中誰是可憐人
左抱琵琶右揮手胡地漢宮能幾春嗚呼古來出婦嫁

鄉曲何曾肯望秦雲哭

戲呈外弟趙才仲

趙郎風味春月柳可到阮公青眼邊秋水黏天劇空濶
曉霜扶月作嬋娟北來好句傳新鴈一夜客愁如少年
安得瓊枝更當眼沙頭同理釣魚船

城北別江予之

但覺與君別孰知歸興長亂畦分宿雨老木掛晨

一作新

霜未計緣詩瘦只知如許忙他年風雨夜重約細商量

訪晁季一

近人鳥雀昆弟語堆案簿書鳬鶩行是中亦自有佳趣
公但徐之渠自忙西風忽來涼月曉楓葉蘆花秋意少
勸君多飲莫多談截斷中流公更參

吳君求詩因作四韻寄之并簡小吳與甯生

文字縛人同束濕吳君不言如坐忘知公胸中有餘地
萬頃亦在一葦航寒梢倒掛夜來雨細草已披秋後霜
寄語兩吳魚小甯莫因詩律廢相望

古劍歌

寒江九月雷殷空落日倒射千山紅江頭樹木半傾倒
衮衮不盡洪濤風風中有物如長戟電光忽來傾霹靂
雨罷晴開不復知乃是潛蛟倚長石蒼皮半卷頗飛動
澁蘚中開欲跳擲青熒野火下絕水天矯長烟轉空壁
天生神物有時出歲月飄流為誰得銅花欲盡秋水渾
尚有千年妖血痕向來天地亦兒戲俄頃變怪徒紛紜
君不見豐城之來亦不久寶氣何為上牛斗

初夏即事

歌呼連牆亦任渠移門賓從又何如

是日西鄰置酒會客甚盛

晴塔

仰日卧紅藥野水趁船跳白魚多病日參籩桶話得閒
時近養生書平生不盡幽居興付與長江

缺釣車

偶作

鄙夫養病苦不足諸公覓官常有餘自是閒人不更事
可隨雲鳥更深居

癸巳自南京過泗上

昔我往矣天欲霜今我來思梅已黃淮山澡雪塵垢面
魚稻埽除藜藿腸好風肯伴客帆遠故國不辭歸夢長
塔中老人莫相笑我自寂然渠自忙

泗上贈楊吉老二首

杯中蛇去無恙醉裏詩成有神相逢不及世故長年倍
覺情親

置王坦之膝上着陳長文車中何似維摩丈室蕭然一
榻清風

題寶應張氏草堂

好風殘暑不同塗
穩看飢蚊自掃除
不謂南軒有佳竹
捲簾相對一牀書

學仙行

長松拂雲根
合抱雪虐霜凌不相到
下有千歲老茯苓
化為琥珀光
自照食之便可登廣寒
不但無病長少年
浮生溷濁那可言
和氣乃為塵務煎
坐看靈藥置泥土
五味雜置成薰羶
豈不聞齊天子黃金丹
成不肯仙且

貪人間樂不能從汝飛上天惜哉韋郎之妙語一失毫釐千萬年

冬日訪朱深明博士二首

北風迎馬入裘茸來訪殘爐半日紅敗屋數間書百篋
無人知是陸龜蒙

見公便是倚松老念我不忘擔板心萬里江山一尊酒
主人無古亦無今

東萊詩集卷五

欽定四庫全書

東萊詩集卷六

宋 呂本中 撰

初別清源姑才仲弟過楚丘作

前村後村鳩亂鳴梨花點雪柳半青
斷雲忽過楚丘縣驟雨已見龍丘亭
故人愁緒各南北宿酒別時同醉醒
語離情緒乃如此故園可歸公不聽

宿楚丘懷石子植顏平仲趙才仲

暮行楚丘北適與寒雨值旅舍一尺泥
又乏芻秣費故

人渺天涯客子初夜至披衣附殘火煮茗當晚饋昏昏
傍晚枕悄悄入清睡向來談笑聲已若異世事但覺舌
本間尚有宿酒味鴻鵠垂秋風意在網羅外強飯無多
談此語敢失墜

發召伯埭二首

柳外鶉鳩相應鳴屋頭新月半輪生知公未便為官
去且放扁舟自在行

曉日烘窓不得眠夾河高柳亂鳴蟬西風種種入愁

思更有長亭十里船

余病不能蔬食懼有五味口爽之責作詩自戒

君不如屈大夫夕餐但秋菊又不如顏平原未晝且食
粥雖知舌本欠滋味頗覺和氣實其腹癡人要盈餘椒
有八百斛錢有一百屋鼎俎沈腥膻杯盤眩紅綠四方
採珍異亦未極所欲寧知下箸處但有一飽足坐償姓
命債百死有未贖何如野僧飯飯晚菜下脫粟撞鐘擊鼓
坐高堂童奴唱飯來相續竹間新筍大如椽樹頭老耳

肥於肉亦不見蟹躁擾亦不見牛骹鯨石郎愛惜韭萍
蘆晉侯睥睨熊蹯熟以此相重輕於君未為福

南山

南山佳有餘我病不自得今日飲君家把酒到曛黑秋
風浩萬頃涼月挂江色對此不能歡何以消徧塞人生
少如意百語輸一默喜逢佳主人略為解羈勒歡然有
餘味即此自溫克陽春內空洞隱如一敵國世賢首陽
餓我愛鄭朝穆却懷三年艾未盡一醉力青蠅閑殘暑

小雨頻敗北，漸須把蟹螯。莫計舟推抑，君看女兒笑。終勝官事逼，殘盃蓋餘漈。慎勿貸鷄肋，要看知我真不獨。觀酒德。

與諸弟諸李同登塔山愚壁以事不能來因成二

絕

李家漾南江，漫流幕阜山。前春更愁無人肯，會西來意且作小詩盟白鷗。

道人不知花滿山，蹇驢出沒松聲間。待約江頭今夜月

與渠他日報平安

春日二首

春日紛紛一段奇
無言桃李任春欺
要須及熟蘆灣去
莫省風吹雨打時

誰將舊日狂蜂蝶
誤入春風桃李蹊
咫尺風光不相貸
無因乞與上天梯

東園

暫開還落不停枝
雨濕東園柳絮稀
遙想釣船今夜月

暗隨潮信與春歸

即事

經旬無客事亦少多病閉門身更輕我自不能知許事
暮江斜雨送蛙聲

和李二十七食蛙聽蛙二首

膏香未即輸鮭菜煎和真同食蛤蜊北人驚嘆不下箸
乞與韓公南食詩

莫驚朋類多驚爆曾伴中郎鼓吹來今日屬官本渠分

晚江烟雨閑池臺

題秦惇秀才園亭

秦郎重構水邊亭
髣髴疎林過雨聲
更喚清泉入屏坐
少留他日濯吾纓

別夜

薄酒殘燈欲別情
暗螢依草不能明
懸知先入他年話
一夜蛙聲連雨聲

寄題蘇州靈巖

水分西子採香徑山是吳王避暑宮可惜同來不同賞
落花飛絮曉濛濛

呈甘露印老

水滿南河月滿牀市樓燈火隔秋江無人可會菴前事
一夜北風吹破牕

壁上人欲行為雨止戲成一絕用前韻

東風不借南舟便細雨輕寒鎖暮江更想亂山明日路
暮天風雨打船牕

江口送壁上人二絕

小雨浮江霜送秋
曉山晴遠讀書樓
道人不作當時面
萬里一帆隨白鷗

今日鉢囊南去人
當時雕句作新春
更知自昔相逢意
定是他生骨肉親

送朱時發

眼底家鄉不自歸
癡人爭忍劫前灰
直饒古廟香爐去
也要披毛戴角來

送甯子儀

洪波奔放不停塵萬劫茫茫寄此身畢竟無人會休去
滿堂枯木不能春

唐張琯書記梁時婦人黃鼎因侯景亂沒北齊為
小校胡兒所虜生二子後附海舶歸聞鼓角得
岸乃知是會稽郡鼎先在梁許嫁張固及歸固
適為剡令求與相見不可乃遣令送之宣城鼎
在齊時作秋風曲渡海時又作詩三章琯書稱

其詞淒怨自琯時已不傳

萬里秋風曲三章渡海詩絕

缺

漢公主略似蔡文姬故

國山河在荒城鼓角悲何如覓張固不用憶胡兒

夜坐呈吳迪吉

伏暑不能旱楚天頻復陰疾雷衝雨斷亂草接江深舊
圃可小摘老盆餘數斟明朝有傾倒相待沃愁吟

與李夫言諸人分題得之字

人生行樂耳此去復何之酒憶侯公聖月如京兆眉未

須誇敏捷或恐勝肥癡不作別離見却憂兒輩知

訪秦氏北莊

午日城西路籃輿疑舊尋稻田疎野草徑接秋陰飯
憶分盤玉書藏遺子金不須千里目枉費百年心

喜才仲兄弟至偶成四十字

落日下喬木好風來暮船徑思投轄飲復作對牀眠寂
寂驅愁外紛紛着酒邊平生五經笥不直一囊錢

春日

數畝幽畦滿小園兒童無事亦朝喧水搖日影上簷角
風送花香來鼻根病去只留花作伴客來常遣鶴應門
城南衮衮塵埃裏不借春江一尺渾

甲午送甯子儀歸洛

異時從公游頗恨相得晚

得一作見

同叅長蘆禪共聽資福

板公今三年病我亦百事懶春風廣陵城笑語有未欸

嵩陽有歸

有一路作贈

河水漸清暖豈無一言贈慰此千里

遠青松老合抱意不在俗眼豈如山上苗共盡白日短

一身隨藥囊萬事付茗盃
爐煙裊晴牕自足了遲緩
奈何孔文舉苦思坐客滿
更知蘇門公遠效嵇中散
舟行儻見念此語試三反

讀舊詩有感

但聞微雨響梧桐不悟高樓盡日風
團扇向人仍有意短檠于汝漸無功
悞游兀缺形骸外恐墮淵源雲霧中
剩攪飢腸供好句為君常占一生窮

別後寄舍弟三十韻

還家日已短況此獨行情客路三年別秋帆十日程小船攜手上斜柳縱篙撐岸失乖龍蟄窓留素月縈重回召伯埭虛住廣陵城破屋仍堅坐殘鶯只強鳴江猶渺潏去草欲蔓延生水縮蛙墓鬪場空霧雨橫土風沾瘡癘民俗混蠻荆豈識排門入魚無倒屣迎好詩思共讀薄酒念同傾枕席煩團扇膏油乏短檠可無道里念或恐夢魂驚惟昔交朋聚相期文字盟筆頭傳活法胸次即圓成孔劍猶霄鍊隋珠有夜明英華仰前輩廊廟到

諸卿敢計千金重
嘗叨一字榮
因觀劒器舞
復悟擔夫
爭物固藏妙
理世誰能
獨亨乾坤在
蒼莽日月付
崢嶸
凜凜曹劉上
容容沈謝并
直須用款款
未可笑平平
有弟能知我
他年肯過兄
初非強點灼
略不費譏評
短句箜篌引
長歌偏側行
力探加潤澤
極取更經營
徑就波瀾闊
勿求盆盎清
吾衰足欲憾
汝大不歌傾
莫以東南路
而無伊洛聲

記夜

殘暑薰炙人安夢不得長忽蒙千里風慰此六尺牀高
梧舞清影上懸明月光初知枕簟穩未厭塵土忙中宵
有臭蟲其大如蛄蜨排闥觸屏帳怒欲凌空翔熟視不
得名但見兩翼張本草所不載爾雅所未詳夏蟲盛百
族此物尤猖狂東窓不得睡幸無疾病妨惜哉有知物
點污此微涼人生要更事美惡無不嘗悉除糞壤念頓
悟服食方去為千丈松凜然衝雪霜慎勿學瓜瓠置身
籬落傍

夜坐

廣陵城中聽夜雨倒牀不眠問更鼓西風萬里卷長河
偏與淮山洗塵土淮南米賤魚亦好敢復摧頽歎羈旅
重簾複幕嬾相負細字寒燈且如許漫如爾雅注蟲魚
更就篇章考齊古粗知俛首受寒餓未暇着意尋豪舉
牀頭有酒不敢飲况復閨門畫眉嫵故人此去今幾時
亦有文字相撐拄東明縣前濟陽路每一夢至猶能數
少年不憚道里遠平生未省別離苦只今多病鬢已白

尚能呼渠醉而舞田園未還君可恨歲月漸晚吾何取
飢蟲遠壁不自聊爾獨何情促機杼

寄唐充之二十韻

俗事自相促吾生常作難長河已萬折險路復千盤坎
壈深藏步岑嶽穩轉鞍誰知守樗散略不悞泥蟠末學
多垂謬微軀寔控搏小兒成項領烈士吐心肝許下少
文舉吳中無伯鸞直須識根柢始是極波瀾念此欲誰
語想公還自寬屢成長劒倚得洗夜蟲酸邂逅終年別

殷勤一笑歡已除古本強仍斲鼻端漫直節羣公念高
名四海間相期更無事所祝在加餐晚日留殘雪春雷
續淺寒欲行殊未必堅坐只長歎不厭道里遠敢辭裘
褐單却尋三語掾重對兩蒲團刺欲洗胸次先留倒筆
端何須灞陵岸回首望長安

竹西亭

十年走塵土重上竹西亭草木新容態江山舊典刑狂
風掃毒暑落月伴疎星認取揚州路荒城一抹青

邵伯路中途遇前網載茉莉花甚衆舟行甚急
不得細觀也又有小盆榴等皆精妙奇靡之觀
因成二絕

花似細薇香似蘭已宜炎暑又宜寒心知合伴靈和柳
不許行人仔細看

玉檜盆榴作隊來異香相趁不相猜從今閉向深宮裏
莫學江湖自在開

飲秦少方家

秦郎家畔一甌茶何處清涼不是家
客子三杯玉泉酒
主人一曲浪淘沙

孫量臣約游乾明借秦少方韻見贈復次韻答之

睦州香火趙州茶走徧叢林不着家
今日為公拈出也

兩橋人語是高沙

僧問睦州如何是自己州云看
香火去僧問趙州州喚喫茶去

春晚郊居

柳外樓高綠半遮傷心春色在天涯
低迷簾幕家家雨
淡蕩園林處處花
簷影已飛新社燕
水痕初沒去年沙

地偏長者無車轍掃地從教草徑斜

外姊趙夫人智量

一作諒

以良人沒祝髮感歎成詩

故人前去冢累累為恨為憂未肯歸從有青山可藏骨
却無紅淚與沾衣饒三笑汝叅禪誤晁四憐渠祝髮非
猶勝同儕二三子枉隨秋草閉斜暉

代贈

十年流落漫西東想見謝家林下風晉邑自思藥孺子
魯儒空望叔孫通風花已分飄藩外玉樹何情著土中

縱有春梢堪寓目却無人面與爭紅

又代贈

略無歸夢遶湖湘漫逐微陰出建章月裏寒珠一生露
鏡中衰鬢十年霜逢人莫唱相思調閱世終無却老方
想得扁舟北還路斷雲衰草更斜陽

閱世一作處世

臨川王坦夫故從谿堂先生謝無逸學北行過廣
陵見余意甚勤其行也作詩送之

王郎別我春已晚索我題詩敢辭懶讀書萬卷君所聞

只要躬行不相反聖人遺言凜可畏小事未免書之簡
衣冠瞻視有法則何獨文章要編刻譬如逆風曳長艦
竭力正在千夫挽君行念此須飽參即是谿堂句中眼

無逸嘗有送吳君
詩云問我句中眼

登淮南樓

樓上西風日脚斜樓前廣道更人家高林稍稍變黃葉
細草重重冒白花薄酒尚堪遠古本故人何事走一作各
天涯蓬籠只繫南亭下乞與寒江整釣車

題淮上亭子

亭下長淮百尺深，亭前雙樹老侵尋。
暮雲秋鴈且南北，斷龍荒園無古今。
露草欲隨霜草盡，歸櫓時度去櫓陰。
秋風未滿鱸魚興，更有江湖萬里心。

夏夜大雨呈若谷叔并晁叔用江子之一上人

中庭電光垂四壁，雨脚溜初如單車。
馳忽若萬馬驟並，牆不相語燈影照。
圭竇翻思共按樂，日月不得又叔能。
糠覈肥姪且藜藿，瘦買田嵩潁間欲往。
今已後旦夕呼。

晁江把酒且相就更煩一上人不語居坐右

贈一上人

細襦紗幘卧軟綾豈知秋色到襄陵
饑烏乍定門門樹寶塔新晴夜
夜燈晚菜聊充肉一臠殘林才當飯
三升平生積嬾成驕情慚媿空房獨坐僧

久雨路絕賓客稀少聞后土祠瓊花盛開亦未果
一往也

卧聞更鼓濕不鳴曉窓但有摧簷聲雲橫不放山入坐

風怒欲倒江衝城東家酒熟花爛漫折簡喚客留娉婷
街頭泥潦一尺許意雖欲往無由行儒生活計亦不惡
蒲團堅坐到日落映窓香穗觸凝塵過眼文書開病膜
明朝新晴有佳處穩看小檻翻紅藥無雙亭下一枝春
玉潔霜清未寥廓閉門嬾出君莫笑看汝多愁吾獨樂
故人無事倘能來為君試舉舒州杓

同狼山印老早飯建隆遂登平山堂

塵埃障西風草木被朝日籃輿郭北門未厭來往疾僮

奴嬾不進頗復費呵叱道人先我行宴坐已一室殷勤
勸客住午飯當促膝爐烟窓紙明鳥語樹葉密却上平
山堂晚景更蕭瑟澄江渺天際妙句不容乞平生泉石
念固自有遺失何能從兒曹十事九不實茲游豈不快
此老固坦率尚從文殊師一往問摩詰

舟行次靈璧二首

往來湖海一扁舟汴水多情日自流已去淮山三百里
主人無念客無憂

小市荒橋貫濁河故人雖在嬾誰何只因遠地經過少
更覺新年坐卧多

己亥上元數同晁季一叔用清坐不出


北風凜凜吹月高萬木夜作窮猿號卧聽車馬赴塵土
愛此一室明秋毫小爐著火晚收焰短檠照坐寒無膏
主人忘言客亦嬾更煩赤脚送茗盃子雲事業本清淨
維摩方丈常蕭散出游苦畏今日閑歸坐略盡平生款
自知衰病損剛腸只要文書遮病眼公能却掃趁閒暇

渠自低頭費牽挽明朝乘興尚能來咫尺吾廬不嫌遠
寄李商老

黃塵車馬流金火戰殘暑西風迎潮來密雲復無雨江
淮早已甚映眼但塵土田疇雜蕪穢草樹翳洲渚緬懷
平生歡捐棄各秦楚千言偈胸次到口不能吐君非一
臂舊此意復可許青蠅暗藩溷有似嚇腐鼠須君濟川
手略為虹蜺舉念之不能眠清坐聽鳴櫓

晚至城南

來往城南路今年又作冬荒林掛落日古寺疊疎鐘職
事日三出交游時一逢可憐河上水唯少莫山重



東萊詩集卷六

欽定四庫全書

集部

東萊詩集卷七至十

詳校官贊善_臣朱紱

主事_臣呂雲棟覆勘

總校官進士_臣繆珙

校對官典簿_臣劉景岳

謄錄舉人_臣陳寶

欽定四庫全書

東萊詩集卷七

宋 呂本中 撰

汴上作

不使西風便解維，且留殘暑震餘威。
累累野水循河下，撮撮榆蟲撲面飛。
五斗漫隨王績隱，一裘聊待晏嬰歸。
平生事業新詩在，送與江南舊釣磯。

初抵曹南四首

未辦歸山計

一作卧病
初無策

今年學作官簿書，妨好夢塵土。

敗餘歡但有妻孥累初無肺腑寬從來畜鮭菜不上八珍盤

久罷攝生術

一作空

藏種樹書病多詩輒廢秋到客仍

疎約帶何辭緩穿靴不暇徐猶勝策高足辛苦曳長裾

併足經庭右褰裳入座隅

一作時

容著帽進雅稱折腰趨

燥吻應難濕殘杯莫強濡平生駟跛蹙今日更長途

往時汪博士勸我便歸休細雨簷花夜長江楓葉秋欲

行殊未必高卧恐無由感歎思亡友端居可沮流

可一作只

言志

馮驩客傳舍彈鋏歌不已託身孟嘗君惟有一劍耳何
事食無魚何事出無輿先生猶有劍至我劍亦無一來
曹南郡優游聊自娛春風吹我衣春草生庭除小便胞
略轉晚髮手自梳仰面送歸鴈低頭羨游魚幸有薄薄
酒浸漬滿腹書安得待天命吾心亦何如長鋏莫漫彈
何必憶吾廬

學道

學道如養氣氣實病自除驗之寒暑中可見實與虛頽然覺志滿乃是氣有餘豈惟煖臍腹便足榮肌膚但能嚴關鍵百歲終不枯道苟明于心如馬得堅車養以歲月久自然登坦途江河失風浪草莽成膏腴熟視八荒中何物能勝予時來與消息吾自有卷舒死生亦大矣汝急吾自徐捷行不為速曲行不為迂一漚寓太海此物定有無誰能具此眼况望將其鬚學有不精盡遂至玉碓硤昔人中道立為汝指一隅千言不知要徒自費

吹噓所以季路勇不如顏氏愚請子罷百慮一念回須
吏忽然遇事入此語當不誣

和趙承之

十日九日昏夢集職事向人如束濕看朱成碧有底忙
然其煮豆相煎急長官抵几入門去小吏垂頭就行立
塵埃上下久可厭學問崢嶸老難入平生謬欲師古人
遇事始知吾不及正須眼底去涇渭便自胸中無滌戟
丈夫蓋棺事則已破屋頽牆使誰葺要隨歸鴈刺天飛

莫待枯魚過河泣

曹州後園夜行

木欲生稜夢不成城頭高下打三更月明如畫柳如畫
更向瑤池南岸行

風吹蒲葦叢三首

風吹蒲葦叢中有霜墮意美人天一涯行

一作客

子初

夜至

風吹蒲葦叢秋色日向晚美人何時來行子飢未飯

行子惜日月，美人輕別離。
風吹蒲葦叢，及時當早歸。

曹南試院懷向子諲兄弟兼呈張擴

大向金相玉，為表小向堅。
車取長道閉門，不見今幾日。
塵埃滿城，何時好病夫坐穩。
百不聞讀書，聒人到夜分。
朝來雨過涼氣足，思與張侯同叩門。

試院中作二首

客夢斷復續，角聲寒更長。
疎籬擁殘月，老木犯新霜。
聞繫身何恨，馳驅汝自忙。
稍知詩有味，復恐道相妨。

諸生未下筆客子且安眠老覺文章退官憂簿領纏短
檠仍有味高枕自無緣但願無他苦今年如去年

擬古

西鄰有佳人開戶納明月月照衣上纓同心為誰結此
結今幾時未解心已折隔林聞搥練起坐更嗚咽情人
在萬里我獨音問缺不聞行路難但見思歸切年來契
濶久烈士或喪節如何空牀居初未見短闕胡馬與越
鳥本自無離別草搖新霜白秋送池中竭君心有斷絕

妾恨無盈歇

正月十五日試院中烹茶因閱溪碑

小爐方鼎蛙蚓鳴那知簾外東風驚亂雲初破盤鳳影
缺月半墮春江明已驅簿領出門去更洗肝肺令愁醒
大碑古字久寂寞高堂素壁空崢嶸坐看光焰掃塵土
便覺冰霰臨窓屏文章斷絕生氣在妙句直欲無蘭亭
嶧山野火燒欲盡瘞鶴半在江中陵不知此書更奇古
反覆饜飫無譏評山精地神肯愛護至今歐虞來乞靈

要令石鼓舉吉日不必細字臨黃庭生平訪古少如意
對此自足忘經營世間兒女爭媚好紙上姓名誰重輕
邇來半月得堅坐一室當行千里程南樓燈火漫明滅
北里笙竽頻送迎儒生事業了不惡故人浮沈吾嬾聽
更闌更自取書讀喚起奴僕尋短檠

試院夜坐

急雨翻燈夜不眠小牀欹側似垂船平生萬事不如意
病後一身私自憐海中神仙渺茫裏方外酒徒憔悴邊

本自無心覓餘地問公何苦愛逃禪

清都行

我昔謁帝白玉墀獨駕翠虬驂赤螭御風而行過日圍
遂登清都游太微廣殿上建明月旗綴以列宿懸雙蜺
帝顧而歎憐其凝寸田不治來何遲我拜稽首心自疑
世俗逼隘臣所知黜慢之故還無期後有美人雲霧衣
玉坐交映生光輝不必翠被緣珠璣祕文玉簡手自持
見我而笑揚蛾眉問我此去來何時握手贈吾藍田芝

汝生甚良學則宜無自輕厭令神馳一來人間今幾時
恍如夢覺不可追骨肉腥穢顏忸怩北風吹寒霜露微
想視倒景凌空飛却從帝居尋玉妃為汝更賦無言詩
試院中呈工曹惠子澤教授張彥實

十日虛房罷送迎不知新鴈已南征忍窮有味知詩進
處事無心覺累輕殘葉入簾收薄暑破窓留月漏微
明知公坐穩無他念識我堦前拄杖聲

寄知上

近有書來欲見尋扁舟南下已春深濁河遠貫長淮水
峽岸遙瞻寶塔臨楊子宦游常落拓茂倫心事轉崎嶇
雲橫雪擁藍關路總是平生願學心

印累累

印累累綬若若不如相逢一餉樂谷量牛馬斗量珠不
如閉門細讀平生書居閒意氣或有餘利害毫髮過不
能以手援其軀風吹月明落我庭樹宿鳥夜驚徐徐飛
去晝夜有程汝何不住前畏彈射後畏網羅

原缺二字

鴻鵠

雲霄可摩亦知人生如意少不如意多富貴欲長保執
斧不見柯印纍纍如此宿鳥飛去何

曹南過五丈河隄入城訪顏岐夷仲清談久之乃

歸

春色不自惜落花如許愁晴天一望遠漕水十分流每
遠長隄去頻因好句留相隨覓李主不必貸河侯論極
文章秘居魚竹石幽和風落香燼晚日泛茶甌壯節知
無用諸儒誤見收江山亦在眼歲月忽忘憂南郭今喪

我長卿仍倦游漫成長韻律勝與小蠻謳簿領憎頻過
塵埃嬾再謀何須五湖口風雨轉船頭

雪夜

政和六年

曹州城南三日雪半夜疾風吹石裂先生睡美喚不聞
不信衾裯冷如鐵病妻索火少聲韻稚子哦詩應歌節
殘書向人老可愛舊劍空在磨先缺未能去尋泉石伴
未用深藏狐兔穴新正已過今幾日歲事嬾復從人說
長江略無千里夢故人動有十年別相逢一笑又艱阻

所向端坐成癡絕城中諸公不相棄時有妙句扶衰拙
頗知晴意在明日泥深不怕車轄折便當脫帽過君家
共放南窓看新月一杯凍酒君莫辭預借炎缺洗煩熱

曹南官舍書事

去歲頭已白今年眼復昏不憂窮刺骨仍有病傷魂酒
薄如官冷年豐荷主恩空庭閒草木終未荅乾坤

早出

早出火莫厭此心吾已灰嚴風逸月落曉氣浹霜回疾

病衝寒怯衰遲畏事催忽忽節漸去衮衮事方來破壁
詩猶在荒城菊半摧還家一樽酒思與故人開

寄江端太子之晁冲之叔用

往歲孟秋月我行東出關人烟渺

一作滿

歸路風雨轉河

灣別恨友游失心成木石頑有隨妻子嘆無語鳥烏閒

曩事空回首微官真強顏舊諳塵土迸頻辱簿書頒日

月勤憂

缺

庭闈實阻艱自忘身

缺

束時得淚潺湲疾

衰猶活漂流老未還悞霜文字癖虛覺鬢毛斑苦語終

難好

一作就

蕪辭漫不刪絕

一作定

知出意表敢復見顏間

二子今懷璧羣公時賜環寄書常恨草雕句得無慳晚

照雲千疊新涼月半彎相忘有道術那得厭塵寰聖治

光三輔皇威極百蠻物能同應瑞民自不藏姦薄技寧

堪奏餘光或許攀何須陽翟望咫尺是箕山

一作相期下江海不

敢厭荆蠻遠樹出頭角諸峯明髻鬟與辭肥馬健且就
小船趁松子猶堪拾梅梢或許攀不須陽翟路咫尺自

箕山

兩鶴行

西風引湖光上與月色亂化為兩白鶴飛來洞庭岸洞
庭無網羅兩鶴願為伴鳴聲既清好羽翼又璀璨一鶴
飛上天久厭俗眼玩一鶴不能飛摧頽自悲歎三年望
絕壁念汝腸已斷昔既薄恩情今還恨霄漢未忍學鶴
鶴裁求一枝換

陵城歌曹州城北十里有陵城坡冢纍然即定陶
恭王丁傳陵也余往來過之傷嗟再三因為作歌

北風吹沙秋草黃漢家故陵當路傍殘墓斷壠趁風雨

狹徑小樹行牛羊當時王子朝未央飛燕姊弟承寵光
大策已定回朝陽不知外家諸舅忙後來變化尤猖狂
佞賢賊莽分行藏豈知漢運中更長濟陽舍中方赤光
終亦變化隨飛揚何獨此地令人傷人生觀此當自顧
位高金多終此路君不見五陵佳氣且如此更復何情
說丁傳

早至天寧寺即趙州受業院也

殘月曉未落疎星點寒林嚴車城南路先聞鐘磬音道

人迎我入共步重廊深淪瑗施淨供水味雜海沈蒲團
近宿火不受塵埃侵欲求半日息簿領勤相尋東堂老
禪師枯木尚龍吟一轉庭前栢諸方疑至今我生晚間
道所向足崎嶇謬傳無字印嘗恐力不任淮海罷行役
吾人多滯淫于馬一枕夢可見平生心

曹南寄親舊

淨名居士默無語翰林子卿虛見尋半世泥塗催老大
中年詩律費光陰江湖每有同歸志酒炙初無獨飽心

三尺枯桐取煨燼斷弦遺譜有知音

大雪不出寄陽翟寧陵

簿書終歲忙風雪一日靜閉門近殘火稍覺諸事勝平生
汗漫游已負麋鹿性微官不能歸但見日月競老人
去已遠我行復未定訓言實在耳無因問溫清歸心止
陽翟悲夢識新鄭大女癡無比有語多未聽小女索乳
啼不與窮屋稱想喚添丁來與汝相和應低頭坐兒曹
氣血安得盛非無車馬心未忍求捷徑顧自阻飢寒疇

能免譏評諸郎何時逢相作玉樹映文章有活法得與
前古並默念智與成猶能愈吾病

與寧陵叔弟別後有懷兼寄趙才仲二首

一別又經月欲來渾未期寧知萬卷讀難療十年飢長
物新添女生涯舊有詩更傷新況味不報老親知

表弟今何在中郎亦漫游平生足艱阻今日倍遲留誤
辱瓊瑶報兼蒙札翰投南窓五更月常照別離愁

大雪不出

晶晶日欲出翻翻風自橫近階三尺雪附火一杯羹老
樹春難別深簷鳥欲鳴新春第三日堅坐若為情

自曹南至陽翟追懷江上舊游呈叔弟

醉別白沙江上亭晚蟬高樹各秋聲風乘小艇鳬鷺進
雨歷疎簷環珮鳴家事不隨王事了新愁常接舊愁生
只今疲病嫌鞍馬十日同居眼暫明

自陽翟至寧陵與虛已叔諸弟別還曹未久知止

復來偶成二十八字

綠徧牆頭楊柳枝
小亭春盡阻歸期
頭昏目暗無情緒
不比少年離別時

試院中作

職事侵人畏作官
略偷身去不能還
樹移午影重簾靜
門閉春風十日閒
尚有文書遮病目
却無塵土犯衰顏
故人何處蓬籠底
看盡江南江北山

去冬試院中嘗作詩云
衣敝蟲可捨
髮垢櫛不下
披衣坐牆角
尚有微火跨
平生足拘窘
今日幸閒

暇新文加點竄欲歇不能罷雖微塵事妨頗畏俗
子罵出門見諸老此語君可畫今年復入試院職
事多窘迫者簿書滿前如赴蹈湯火也再次前韻
誰令君作官衮衮簿書下誰令君不學陷穽乃欲跨
一作欲凌跨 緬懷北窓翁斯人蓋多暇田疇望家遠日月已
秋罷尚蒙諸公憐未至官長罵何時歸來圖更作一
段畫

雨後數與李仲輔兄弟往來且約十七日同過士

特因成長韻

鄰鷄再三鳴不改風雨晦東裝向前塗恐與泥潦會故
人時一來共此一室內微言久已絕苦語或未遂子孫
甚竒古却立有餘地舊從伯氏游則已聞令季斯文倘
未遠吾今盡憔悴相期無何鄉獲保清淨退藏身稠人
中着眼世事外山空倚巖石雪立老杉檜往來相遇難
更自少如意旦日過城南把酒公一醉

首夏二首

生平寡嗜欲頗願得少閒盡讀未見書徧尋雲外山往
來二十年昔者盟未寒妻子見驅迫低頭言作官朝翻
朱墨案暮對藜藿盤豈無一畝官令汝得少安向來
棲息地苔竹奉餘歡何時二三子共駕牛車還汝實江
海人悞令塵土干舊游在彷彿欲往當不難但去眼界
窄自然心地寬

空庭下疎箔樂此樹蔭美鳥聲相續來百種皆可喜日
長少文字俗事不到耳開窓略須夜月露欣瀾瀾頗念

閒居樂感歎投筆起吾家

原缺四字

我入骨髓還家治場圃

喚我共料理會同江海去更欲附船尾平生跨歛段不敢廢鞭箠誰云馬中龍一日有萬里卜鄰吾所知江

晁老兄弟

東萊詩集卷七

欽定四庫全書

東萊詩集卷八

宋 呂本中 撰

問晁伯字

物生無榮賤悉是君所見相值有相違誰能滿吾願
田園棄荒蕪官居走郵傳誤尋文字盟秣馬當百戰一飯
或未飽逢人足嫌怨窮於投林猿窘若巢幕燕忍學少
年子羽翼偷絢練百萬買纏頭千金奉娛宴願為匣中
玉不作秋後扇丈夫重許與正爾未為倦絕糧有不死

酒肉虛健美古人馬伏波吾猶識君面

將去曹南連得江晁書因歎存沒諸友遂成長韻
西風脫殘暑我病不自聊吏舍少還往亦復長蓬蒿欣
然脫帽去念此非一朝陽翟未遽往寧陵虛見招初無
食息地未免柴水勞故人數遺書尚有江與晁窮途感
節義俗耳受風騷向來相知人昔盛今寂寥落日送汪
謝荒小留老饒關侯最傑立亦以膏自燒後生有向子
更盡兒女嬌出門天奪之不令上雲霄坐看朋友淚未

減春秋褒怪我但羸疾悞蒙風雨搖日月費奔走文章
勤琢雕會須領妻子更欲投吾曹耆舊喚歸隱諸公憐
久要劉丈器之及顏平仲向伯恭韓秉則諸人皆相約為一則之隱以便往還講習之益出同赴
鷄黍歸但守簞瓢相將訪雲山所至雜漁樵還當古
渡口卧聽西江潮

精衛詩

西山有鳥其狀如烏名曰精衛其名自呼精衛堙海不
堙不止問誰之報云帝之子帝子女娃往游不還精衛

求之不敢有安海流不改汝堙不遷嗟哉精衛志則可
憐我昔讀書惟聖之求竭力從之以春及秋老人宴居
審吾之學惟時友朋日就雕琢聖言甚微吾意則近近
以識微退或有進三年于曹惟罪之恐人雖甚厭子亦
不勇舒舒其雲沄沄其水子不與歸而曰有以豕羊在
牢芻秣之戀烹庖及之抑又誰怨予學日遠子道日疎
有愧精衛其誰與居精衛之飛不必戾天子之不如寧
有智焉惟作與否愚智之擇小人作詩惟一勸百

寧陵弟相送至南京因成四韻寄季一子之叔用
白髮無端巧上頭鏡中顏狀不能羞要尋揚子一厘地
未用劉公百尺樓野竹連陰護蒼蘚暮雲生雨續黃流
秋風有信鱸魚在更約江晁共小舟

十一月一日步河堤上

簿書糾纏人欲出不自許老叟環我前更作附耳語脫
身上河隄頗似晝伏鼠河堤平如掌下有千歲土夕陽
斂殘照草木過寒雨游魚著鉤餌舟子快新煮煮魚得

放飯尚歎行役苦江湖平生心歲月可逆數故人書斷絕吾事有去取歸來討清尊妙句還一吐

留侯

留侯下邳時豪氣或未除晚節欲輕舉效在黃石書其書本無言一嘆三嗚呼彼公實天人識此鵷鳳雛良田有蕪穢令子痛自鉏萬事不得已一身常晏如袖手默無語四方瞻步趨不知隆準公果能知子無小兒荀彧輩下及崔浩徒謂能明子心此語亦已誣不能處其知

正足殺其軀所恨生已晚聖門無坦途學不盡其才未免風俗驅詩書在煨燼子何不回車試問禮之本更觀心地初

莊生言欲當則緣于不得已不得已之類聖人之道留侯蓋庶幾于此韓非曰非知之難處知

為難矣此留侯與荀彧輩所以分也使其親受業于聖人蓋未可量故予作此詩論其大槩實平昔所粗曉也

送韓撫秉則赴棣倅

公如玉壺冰見即離煩熱况當清秋懸更自貯霜月中
邊本無垢何處覓焚熱盛以百鍊鋼此亦不得折初蒙
一日欸遽有千里別扁舟轉青齊歲事當雨雪遠行不

羸糧已悟服食訣古來饕餮徒頗謂一世傑唾壺彼何知便為如意缺觀其所用心俱不異鼠竊首陽獨往人渠自飽薇蕨舉頭公一笑百慮無以絕江源初濫觴末乃流不竭傷哉韝上鷹一飽便飛掣

讀秦碑

秦人跨九州欲以傳萬世立石名山傍往往章

一作得示

意至今見遺刻字體甚雄異壯哉蒼籙文未改回屈勢風雨所侵蝕中有千丈氣嚴如虬龍蟠深若鐵石利餘

威到山鬼謹守敢失墜漢魏能書人亦豈可睥睨未能
識藩籬何止赴姿媚初無一日雅但有三舍避文章又
奇古遷雄蓋苗裔觀其所稱一作著迷肯為尊者諱巧言

未大失未乃為俗累嗚呼結繩前此又誰與記君臣共
無為垂拱天下治春秋紀日月太易垂彖繫嬴氏厭休
息動以衡石計斯翁變古文程邈分篆隸自此更滋蔓
日以趨簡易馳驅千百年漫有紙筆費誰能罷煩文盡
掃諸天外此書雖見存或以少為貴持此槁木枝我亦

無甚愧

次韻荅曹州同官兼簡范寒信中

好詩有味終難捨俗事無功莫羨渠
破厯屢翻深甕酒短檠時檢舊窓書
何年鷄黍先投社是處田園可結廬
更請二公搜好句一身疴癢要爬梳

龔彥承觀軒

愛山不能歸常恐山怪責終歲在行役
感動頭已白高秋強僮僕路過龔掾宅
蒙君開南軒除我眼界窄白波

遠青嶂彷彿見顏色江上飛來峰却立對君側蕭蕭蒲
葦叢不受塵土隔知君有奇趣笑我常偏仄人生無窮
已得一乃願百牀頭貯美酒窓下著好客請公但默然
歲晚當有獲

畫馬圖

平沙遠草春未生萬木夜起爭悲鳴秋雲欲墜

一作墮都

護壘急雪暗下屯田營邊人却走畏深入漢家飛將已

雲集此時一馬直

一作費

萬錢隴右河湟更供給邊塵淨

盡今百年萬馬潦倒西風前天生駿骨例艱阻是處雕
鞍蒙受憐君家九幅開新帳欸見腰褭華堂上長鞭不
用羈絡遠霧縠雲羅倚惆悵高旌嫋嫋霜露微首宿
得雨連山肥同時戰士今不歸曹霸弟子能神奇毫端
妙處君得之駑駘往來空爾為

堤上

落花吹盡不堪憂只見河堤水漫流晚日強穿城北市
春風猶駐驛南樓妻孥轉覺為身累歲月終難望汝

留萬里長江一樽酒故人何處倚扁舟

將赴海陵出京治汴覓舟候送客不至遂行

子行殊未來我馬已再秣略投故人飯苦厭從者聒長
河見舟楫尚恐塵事奪風翻蟬急噪雨漱岸欲缺南山
已在眼想望淮水濶別離古所重況在交友末翩然欲

行際所寄一短褐路長書來稀何以慰飢渴

四月二十
二日出城

至子我家候子之民師不至因簡商
大壯與夷行伯野季一由中諸公

京師新鄭與諸晁兄弟往還前後數詩

夜語不嫌久凜然天欲秋客燈吹屢滅細雨落還休未
許金張並虛為鄴杜游江河少歸夢知為故人留

我髮日已短公愁安得長牆根春薺老瓶水臘梅香侍
立無天女相隨有漫郎平生湖海興今夜宿連牀

髮短各已白眼昏誰復明殘春斷花柳晚日閉柴荆潦
倒書常廢驅馳夢或驚尚於團聚樂雖老未忘情

令弟窮顏蠅書生老仲舒相招得共處何往更安居歲
月塵埃外桑麻雨露餘送行無別物圯上一編書

苦語相留極虛牀會宿頻山東今出相海內不無人婦
女能尊客兒童不厭貧長途有知遇今日倍情親

本中將為海陵之行念當復與子之作別意殊憤
憤偶得兩詩上呈并告送與壯輿叔用也

斯人如玉雪可愛不可忘助以濯滄海亦復閱餘光今
茲困塵土更伴衆翼翔時來喚我語共此一榻涼風雨
來頻舌冰霜清肺腸我老漸窘束公才方頡頏春秋有
體制子蓋能文章要當纂微言不以近故妨粲然東

園花不登葵藿場

老僕倦日長羸馬困道遠東行數日間尚欲一再歎
我能喻子意子亦識我嬾追懷十年游僅得一笑莞時
能煮湯餅更復下茗盃晁郎本京邑劉子蓋楚產江山
兩秀異與子日在眼南風動歸興感慨毛髮短相尋倘
有日歲月亦未晚

鴈

鴈從何方來云自燕趙北今當何所往暖日近陽谷寒

雲墮江漢未見所棲宿朝憂稻粱少暮畏羅網遂惜哉
還住頻愈覺歲月促悔不近藩籬隨羣伴鷄鶩羽翰何
必好志願亦易足物生有高下終恐厭摧伏公看滄海
頭萬里飛鴻鵠

赴海陵行次寶應

一作過
白田

半升濁酒試尊羹賤買魚蝦已厭烹淺水依蒲有船過
淡烟籠月更人行交游潦倒腸先斷疾病侵陵涕自橫
北望中原一作幾千里故人誰復喚歸耕

海陵雜興八首

四海今誰託飄然未有歸先生作詩瘦稚子食言肥未
忍螢枯死甘隨鷁退飛故人取堅坐不為賦無衣
相見各已老壯懷如昔然蛟龍夜改穴風雨暗移船把
酒猶堪醉逢人嬾問禪還家有餘地留我買山錢

諸老今無恙秋來數寄聲尚能無事飲猶勝不平鳴行
李虛長缺生涯共短檠江湖日在眼恐負白鷗盟

荒城足風雨今日更新冬草木山嵐暗人家水影重漫

看文字過時有簿書逢目極橫塘路西樓聞暮鐘

曾子不復見斯人絕可憐夢回千嶂裏氣奪萬夫前

異日文章社平生香火緣高樓更南望霜落

一作倚路

江天

時曾元似新物故

萬事不如意自然添白鬚極知少餘韻何敢厭窮途
土俗尊魚婢生涯欠木奴東行見李白誰為致區區

空山鶴夜鳴海風令人驚對月且愁思看書終眼明斗

酒不為薄客帆那計程猶憐他夜雨曾作打窓聲

輕帆載曉月和夢到

一作別

揚州木落山光寺江橫北固

樓漫拋王往隱虛有十年游尚勝劉師命才因越女留

往來送迎城南道中二絕

破裘重補却勝寒暗減頭圍覺帽寬數頃桑麻遠城路
每隨妓吏去迎官

海氣如煙跨市樓北風連夜舞

一作雨

梧楸平生事業難

牽強坐聽寒燈守聒囚

家叔舍弟與黎介然會于符離因用兩絕奉寄

漫約同歸久未償只今留滯各他鄉
春風有信勤歸鴈
夜雨何時復對牀

老覺為官百不宜故人雖在鬢如絲
遙知再踏同游地

更想汪饒曳杖時

余昔與介然德操
信民同寓符離

病中夜聞雪作時堯明有廣陵之行未歸思為數

語奉寄久之未就他日堯明歸攜詩相過飄然

有御風凌雲之氣因以前詩荅之

公方他山行我此一室病擁爐聽夜雪若與風勢競蕭

條中疑休狼藉久未定平明望屋瓦入我眼界淨所恨
子猷遠無復肯乘興想當巖壑間玉立與輝映時來
有傑句遂入風雅正寒威固深避草木自溫清公家鶴
氈翁韻與羲皇並流風及遠孫筆力如此勁雕績或過
眼惟我乃弗稱新春上河堤梅柳當厯聘過從不厭數
荒疇取微徑

次韻堯明貢院詩

忍窮不能歸強飯亦良計東風頻報春草木可次第厭

為龍頭縮寧作龜尾曳從來翰墨場

一作文
字娛

即一作有

聞見滯譬如已耕

一作
耨

田更欲深種藝或蒙鹵莽報未

肯

一作
忍

即賣棄不聞太倉粟亦

一作
肯

校毫髮細玉卿固

倦游穢濁有

一作
乃

蟬蛻聲名動時人

一作
流

我實託末契

泥塗倒屣齒塵埃浣

一作
滿

衣袂要為無用用乃作不事

事下馬

一作
重尋

舊戰場午日在庭祀

一作
砌

向來槁木枝忽

有紅綠綴來非偶然住去亦無所詣聚蚊著甌中得

一作

忽聽此鶴唳窓前有餘馥勝韻入松桂扁舟下淮南間

里思少憩熟觀昔所歷請與居士戲江湖要同歸不假

木蘭桹

一作萬變才一戲滄浪
要同歸更整他日桹

海陵夜作

夜長夜長天復霜海陵城中今夜長夜長夜長冬向晚

一作天
向暖

寒堦無人看月滿

一作海陵城
中今夜短

路長

一作家遠

來信稀水濶山深歸夢短

一作斷

堂上書生頭已白朔方

健兒十年客想渠當此夜長時撫劍雖長酒杯窄明妃

愛惜漢宮衣烏孫公主終不歸戚姬去視鴻鵠舉更為

君王作楚舞當此夜長誰送迎此月還

一作亦

如今夜明

夜長夜短公莫厭寒即重裘熱須簟夜長夜短公莫憂
多憂多厭公白頭

東萊詩集卷八

欽定四庫全書

東萊詩集卷九

宋 呂本中 撰

秋夜行

八月九月啼寒蜚十月北風天雨霜客游無聊思故鄉
鄉書不來空斷腸鴻飛何為滿夕陽舉頭攬取明月光
置我堂上方天牀滿酌玉杯碧淋浪喚取姮娥來共嘗
人間歡樂壽命長不須辛苦老桂傍

臘梅

學得漢宮粧偷傳半額黃不將供俗鼻愈覺更清香

牧牛兒

牧牛兒放牛莫放澗水西澗水流急牛苦飢放牛只放
青草畔牛卧得草兒亦嬾兒嬾隨牛莫著鞭幾年力作
無荒田雨調風順租稅了兒但放牛相對眠

洞庭

嘗聞洞庭湖秋至清皎潔往來八百里長風駕明月中
有仙人居容顏若冰雪我願從之游問渠傳寶訣脫冠

養霞佩長與塵世別

細雨

細雨不成雪北風來解紛冥冥小江樹漠漠暮空雲誰
惜江東弟令修地下文西齊千萬里遺恨不堪聞

王陽

王陽作黃金才了車馬費苦身邀聲名未免遺俗累何
如陶淵明蕭散塵世外公田二頃餘覓酒償一醉高風
久寂寞斯文若旒綴白眼看世人此意渠不會

題趙丞瑞薏苡圖

甘泉殿中芝九莖不與百草同條生當時祥瑞已稠疊
薏苡亦未來爭衡漢星不容矍鑠翁此物不與明珠同
爾來萬物更變化薏苡寧甘死荒野放遣根苗霜雪
白炯若微月來清夜趙郎好事古亦無俯拾傍觀盡
圖畫畫師不辭粉繪費遇時亦得千金價君不見古來
異瑞與奇祥何曾不致南宮下

即事

清陰庭中槐綠潤牆外草職事苦見妨令人惡懷抱朋
從多飄徙今我獨枯槁高牀書數帙時節豈不好不能
遂爾去但覺歸思浩人情便久習世態嫌衰老閉門了
殘詩昔者跡已掃何時北窓風清尊為君倒

寄晁以道

朝辭陞山清暮宿賴水綠往來百里間得此意已足吾
人少如願夫子更絕俗閉門觀易象未用傷局促使
我三日留共此一室獨皎如嶺頭月凜若霜後竹欲為

斯文壽以作學者福洛陽佳少年撫事多慟哭此其於
聖學何異狗尾續寧知草玄翁萬事不掛目深湛而雅
澹亦不在反覆吾祖早聞道晚與夫子熟相期千載外
未得一世伏滌山竄鼯鼯晚日度鴻鵠誰能從公游歲
月如轉燭

橋上二首

城北城南柳絮飛街東街西鶉鴝啼海陵三月與春別
一夜雨成三尺泥

風雨屬連春事休十日九日缺城頭雖無俗物敗人意
可使澄江消客愁

次韻遜叔直門見寄兼請堯明同和

紛紛塵土計秋豪忽送長江八月濤陶令且為州祭酒
鄧公才可掾功曹但看秋到猶絺綌即是花時合緼袍
待得公歸吾已老滿田余蓼與誰嫗

萬字同豪
字韻收

再和兼寄奉符大有叔

血氣侵凌不復豪往來歌倒似乘濤寧知嬾過嵇中

散亦有詩如謝法曹舊稿只堪供醬瓿故人相贈有綈袍兗州賓主同風味惡句煩公更一搗

雨後至城外

日日思歸未就歸只今行露已沾衣江村過雨蓬麻亂
野水連天鶴鶴飛塵務却嫌經意少故人新更得書稀
鹿門縱隱猶多事苦向人前說是非

龐公

卧龍雛鳳不曾閒舉世皆危子獨安應念橋公無特

操晚將情話向曹瞞

衛青

將軍相繼出天山漢主開邊意未闌
本自無心接賓客故人猶有一任安

雜詩三首

烹葵去王畿剥棗在海角歲序忽已周
月亦頻告朔向來手中扇今此已倦捉
尚嫌簿領繁不厭朋友數塵埃向奔走
文字費雕琢途人有前知子乃獨未覺
出門見

大路夫子焉不學

結髮在簡編俗事方刺促往來三十年未見可棲宿微
官不能去尚恐遭逼遂歸棲則在念所望一枝足頻蒙
故人悞豈有鄰可卜出門雖無車徑自騎黃鵠重尋置
錫地青燈一盂粥

飢蚊青而花怒目虬兩鬚黃昏與我遇且復少踟躕肌
膚恣啖齧熟視不可毆中宵盛徒黨意氣若有餘傷哉
陷穽虎有時被囚拘求食至搖尾曾此蚊不如雲龍困

螻蟻此語不可誣

秋日三首

諸卿談笑賞先登我欲從之病不能門閉日長公事少

祇一作却疑身是住庵僧

塵滿文書燈暗檠荒城相望數殘更莫言愁罷無佳處

睡正熟時聞雨聲

往來奔走一作馳騁看渠忙疾病低回却未妨喚客不須嫌

酒惡隔牆時喜送橙香

橙二首

西風吹鴈欲斜行小檻寒花却未香
將謂諸公頻載酒枉留橙菊十分黃

不辭玉露著新行漫作人間徹骨香
知道輸棋償舊約故留殘菊一時黃

寄京師親舊

屋頭橙實如李梅庭下葵花深覆盃
豆田失雨不稱意野菊出苗虛見猜
故人相望一尊酒問我此往何時回

江山空自污敲扑筆硯洗復生塵埃交情自惜少同調
人事只今多好乖欲隨明月覓公處限以白浪搖長淮
舟楫誤逢蛟鱷橫歲月苦遭霜露催側身西望莫回首
堂上書生心已灰

和成士穀鹿女泉詩

成子東游十日程駝裘顛倒帽歌傾新詩頓數神仙事

病耳忽聞京洛聲去住閒

一作同

經幾塵刹往來

一作還

相

望一牛鳴再尋六月山前路分我寒泉數勺清

春申君

少年談笑解秦兵，便欲連從却未成。
莫謂江東可長保，暮年無意引朱英。

秋日三首

罷馬厭鞭策征

一作飢

鴻思稻梁終年在，泥土永路困風霜。

慎勿鞍韉愛直須，矰繳防吾衰亦已甚。
念爾不能忘

交游大半死，吾亦老相侵。
古木十圍大，寒泉百尺深。
恨猶能切骨，愁或至傷心。
寄語南飛鴈，君無笑苦吟。

獄掾酸寒極官曹冗長催真同鶴久住不學鴈輕回婦
女能相笑兒童忍見猜猶憐舊耆老時有一書來

和成士穀海安道中見寄

成侯老更嬾處世一虛舟暫脫塵埃夢還尋江海秋從
來仙聖宅不數鳳麟洲有意相隨否因公更一將

送虞澹季然之官京師

車如鷄棲馬如狗勸君莫美循牆走車如流水馬如龍
不如還家行御風以尻為輪神為馬世人計出車馬下

出門險阻道里遠只今誰是能行者海陵事劇俸則薄
得公相從亦不惡小吏相欺官長怒我自作煩公笑樂
庾公故是豐年玉道貌更自見不足斷崖獨立老松柏
青天何處飛鴻鵠汴堤六月塵自障請公登高更南望
馬煩車怠早歸來且從夫子濠梁上

獨立一作百丈
何處一作萬里

海陵病中

一作寄劉器
之丈五首

病知前路資糧少老覺平生事業非無數青山隔滄海

一作
江海與誰同往却同歸

先生高卧了殘冬我亦年來不諱窮
夜半打窓人不曾
滿天風雨角聲中

客游歷歷都如夢身事悠悠略似僧
只麼隨緣作官
不知從古更誰曾

往來車馬鬧泥塗一室蕭然百事無
語默二途俱不涉
一作本自無
言亦無默
不勞辛苦對文殊

久一作飽諳罷卧嬾呼醫
刺讀文書不療飢
數有故人

來問疾更煩耆舊與傳詩

次韻季叔友賀堯明登第叔友丹陽人也本中得
其人之詳於王堯明恨未之識也堯明擢第叔
友作詩賀之堯明令繼作既喜叔友能不妄許
可又嘉堯明進退取舍皆中乎道也三首

柴桑無復陶元亮谷口虛傳鄭子真
二子風流知有在
且留餘味及吾人

澄江雖近不容親亦是人間可喜人
枯木巖前有歧路
一杯濁酒自成春

二子深居筆吐虹從來節氣萬夫雄
欲知聖主求賢意不為相如詞賦工

次韻堯明見和因及李蕭遠五詩

小閣纔堪置一牀病軀雖在鬢滄浪
隨身行李無長劍猶勝堆錢與窟郎

交游潦倒漫虛名悞結他生文字盟
踏盡塵埃公莫厭不應因酒愛江清

文人飄散各窮途諸老交情却未疎
賴有清詩在書案

時時翻讀伴更初

萬里星河指顧間此中何自著江山精金百鍊終無用

才與佳人照

一作點

指鐶

阮公游宦喜東平賀監從來憶四明但得從容飽麤糲
不須辛苦辨有鯖

西歸舟中懷通泰諸君

一隻一隻路傍堠乍有乍無天際星亂葉入船侵破衲
疾風吹水擁枯萍山林何謝難方駕詩語曹劉可乞靈

酒盞茶甌俱不厭為公醉倒為公醒

寄馬巨濟察院時監泰州酒得宮祠歸南京

新春款南園積雨寒不歇起望海陵城幸未還往缺聞
公得安還未放車軌折毫端倒江海胸次湛明月東風
片帆來乃復為此別田園到荒蕪歲事有曲折不見南
山松高卧擁霜雪鬢髯凜可畏此豈念容悅願公考其
然一向鼻頭說

寄趙十弟

十年流落各西東再見初非舊阿蒙晉邑自思藥孺子
魯儒空望叔孫通宦情潦倒三荒徑世味衰頽一秃翁
石室度籌吾豈敢且看鮮健勝龐公

叔度李明學問甚勤而求於余甚重其將必有所
成也因作兩詩寄之

兩章後來秀頭角固嶄然但語強弩末不爭駑馬先寓
言有十九曲禮至三千所要在守節末言能與權

念我少年日結交皆老蒼曹南見顏石角上拜饒汪

平顏

仲石子植汪
信民饒德操

敢幸江海浸得霑藜藿腸諸郎但勉力餘

事及文章

與季宏子植同過信中飲薜荔亭下夜分乃散別

後奉懷遂成長韻

殘花無言卧風雨小亭寂寞延初暑范侯置酒呼我來
共坐堦前洗塵土坐間問有李與韓文字崢嶸各奇古
起卧逡巡失杯杓笑語瀾翻雜歌舞滿城車馬閑侵淫
誰解牆陰着樽俎薜荔扶疎出枝葉老氣橫空君一吐

人生此會不可常昔者各在天一方簿書相急如探湯
好風吹我來君旁鶯啼燕乳各自忙明日酒醒空斷腸

秋日呈顏夷仲

老去身已衰事過意愈嬾斯人未寂寞吾此歸亦晚疎
籬帶落葉秋色忽已滿南窓可炙背喚婦同茗盃舊讀
無新功亦復費編纂凝塵亂朱墨妙句折編簡往者荷
篠翁實具世外眼不能與之游只有興盡返曹南二三
老夙昔荷推挽平生萬卷書未盡一日欸微詞絕端兆

自怪識者罕願聞片言佳庶用收褊短

謝任伯夫人挽詩

幽蘭在深山無人終自芳豈伊桃李顏取媚少年場
高氏有潛德奕世被輝光自其父祖來低首不肯昂
夫人既賢豈止秀閨房出身事夫子和鳴更鏘鏘
鏘鏘列兩序圭幣羅中堂云何去日遠遂棄凌風翔
仍也奉慈訓將見久必昌瞻彼汝南路松栢泣新霜
淒然馬鬣封千歲終不亡

贈筆工安伋

昔人三年學屠龍技成不試身已窮安生不願泝澣封
嗜好乃與屠龍同使世淬礪磨其鋒側出逆曳求新功
伋也中立無適從隨所欲用吾能供歛溪孕石南山松
四方萬里時一逢病夫乍聞百念空敗毫破管塵埃蒙
明窓淨几聊從容眼無列宿羅心胸使汝得見文章公
展卷略書吾已慵

寄共誠賈秀才

萬里歸來四壁空
舊游渾在默然中
明年我欲江南去
何處留詩可寄公

題大名官舍

宿昔尚殘暑
晚風吹欲無
不知留此住
更白幾莖鬚

東萊詩集卷九